



CONCLUSIÓNS

do equipo autor deste informe

Primeira. O crecemento económico galego en 2010 foi dun 0,1%. O dato mellorou o estatal (diminución dun 0,1%). Ampliouse o diferencial coa Unión Europea, nun ano no que ningunha comunidade autónoma chegou ao crecemento económico medio desta.

Por ramas de actividade, a construción presentou o peor dato (-5,8%) mentres que o mellor tiverón a rama de produtos enerxéticos e o sector primario (ambos cunha suba maior do 3%).

Segunda. O comercio internacional tivo un dinamismo notable, pois as exportacións galegas creceron un 10,2% e as importacións un 7%. Galicia rexistrou en 2010 superávit no comercio internacional, mentres que no saldo exterior total (co estranxeiro e co resto do estado) Galicia foi a terceira comunidade por saldo negativo absoluto e a cuarta por porcentaxe de déficit en relación co PIB.

Terceira. A taxa de inflación de Galicia en 2010 foi a maior do último trienio: un 3,1%, unha décima por riba da suba media dos prezos no conxunto do Estado.

Cuarta. De acordo cos datos do Directorio Central de Empresas do INE decreceu por segundo ano consecutivo o número de empresas nas catro provincias galegas. As empresas galegas diminúen en 2010 nun 1,41% con respecto ó ano anterior; representan un 6% do total estatal, das que arredor da metade non teñen asalariados.

Quinta. O gasto en I+D de Galicia supón co último dato dispoñible o 0,96% do PIB, cunha diminución de 0,08 sobre o do ano anterior; lonxe da media estatal (1,38%).

Sexta. Galicia conta con 595 cooperativas inscritas na Seguridade Social. O número de persoas traballadoras que desenvolven a súa actividade nelas é de 66.747. O número de cooperativas ven minguando nos catro últimos anos, pese a que o número de persoas traballadoras experimentou unha lixeira suba respecto ao ano pasado.

Sétima. A poboación galega diminuíu en 2010 nun 0,1%, mentres que no promedio estatal subiu un 0,3%. Galicia volveu a ter nese ano a maior diminución absoluta no saldo vexetativo e, a diferenza de anos anteriores, o decrecemento natural da poboación produciuse nas catro provincias galegas.

Oitava. A poboación ocupada de Galicia baixou en 2010 por segundo ano consecutivo, e fíxoo en 51.000 persoas, un 4,4% (tres décimas máis que no ano anterior). Diminuíu en todos os sectores produtivos.

Continuando a tendencia iniciada no ano 2008, a taxa de ocupación galega (45,9%) baixou un 1,8% e quedou 1,9 puntos porcentuais por baixo do promedio español (47,8%).

Novena. A poboación desempregada de Galicia medrou en 2010 un 20,7%; fronte ao incremento medio estatal que foi dun 8,6%.

A taxa de desemprego galega segundo a EPA foi en 2010 do 15,4% (2,8 puntos porcentuais por riba do ano anterior), mais de catro puntos por baixo da media estatal (20,06%). No grupo de menores de 25 anos é do 35,41%, triplicando o índice medio de persoas desempregadas.

Décima. Os datos do paro rexistrado amosan un incremento do 6,5%. No conxunto de España produciuse unha subida do 4,5%. A taxa de paro rexistrado acadou o 18,3% en 2010, amosando un peor comportamento no caso das mulleres, onde acadou o 20,95% fronte ao 15,62% do colectivo masculino, pero cunha tendencia a reducir as diferenzas.

No sector servizos é onde máis demandantes de emprego se concentran, pero é na categoría “sen emprego anterior” onde se experimentou o maior aumento en termos relativos en 2010.

Undécima. Mantense unha maior representación dos homes na contratación (52%) fronte ás mulleres (48%), cunha prevalencia destas nos contratos temporais e a tempo parcial, pero cunha tendencia positiva nas contratacións indefinidas a mulleres, chegando en 2010 ao 45,69%.

Compre destacar que seguen existindo modalidades contractuais eminentemente femininas como a interinidade (72,40%), mentres que o de fomento de emprego tende a igualar o seu reparto (51,76%). No sector servizos e ocupacións como empregada administrativa e servizos de restauración, persoais e de comercio mantense a maioría feminina.

Duodécima. Polas características do traballo das mulleres (máis traballo a tempo parcial, subrepresentación en postos altos, menor antigüidade media, maior temporalidade, categorías menos retribuídas altamente feminizadas, etc.), as mulleres galegas percibiron un salario medio anual un 24,83% (27,67% en 2009) inferior ao do home, e o 33,50% das mulleres galegas tiveron ingresos iguais ou inferiores ao S.M.I.

O importe medio das prestacións por desemprego percibidas polas mulleres galegas foi do 89,20% das prestacións percibidas polos homes. Do mesmo xeito, as pensionistas galegas só percibiron como media o 73,89% das pensións do grupo dos homes.

Décimo terceira. As excedencias para o coidado de persoas dependentes foron solicitadas por mulleres no 84,89% dos casos. Porcentaxes similares danse nas excedencias por coidado de fillo (95,48% de mulleres). Do total de persoas que desenvolven un traballo a tempo parcial por coidado de fillos/as e persoas adultas enfermas, incapacitadas ou maiores, o 97,19% son mulleres.

Décimo cuarta. O volume de contratos rexistrados no ano 2010 apenas varía respecto do ano anterior. A entrada en vigor da Lei 35/2010, de 17 de Setembro, de

medidas urxentes para a reforma do mercado de traballo non ten o impacto previsto na contratación indefinida que cae nun 35%.

Tanto no sector público como no privado, experimentouse unha redución do peso da temporalidade sobre o ano anterior. Mantense polo tanto a tendencia decrecente iniciada no 2008 no sector privado, non así no público. A contratación temporal no sector privado acadou un 23,5% no colectivo masculino e o 27,8% no feminino. No sector público situouse no 17,5% e 29,2% segundo sexan homes ou mulleres. A rotación de asalariados galegos foi de 3,11 contratos eventuais por cada traballador, e a das asalariadas galegas acadou os 2,64 contratos.

Décimo quinta. Con datos da Seguridade Social, no 2010, diminúen globalmente as cifras de empresas en alta, sendo a excepción los réximes especiais agrario e do mar, resaltando que o 87,95% das empresas teñen menos de 10 persoas traballadoras, e a ocupación elevada de persoas traballadoras en empresas cuxa titularidade corresponde a persoas xurídicas.

Décimo sexta. Continúan a facerse patentes os efectos da crise en 2010 e o número de afiliacións á Seguridade Social diminúen en media anual en 22.200 persoas, mantendo a tendencia iniciada no ano 2008. O descenso das persoas activas prodúcese en todos os réximes agás o agrario e en todos os sectores de actividade agás o sector servizos, que medra en 5.600 persoas afiliadas en media anual.

Décimo sétima. Diminúen en 2010 as afiliacións á Seguridade Social no colectivo das mulleres en preto de 2.700 cotizantes, se ben estas incrementan o seu peso relativo pasando a representar en decembro do citado ano o 45,56% do total das persoas afiliadas en Galicia.

Décimo oitava. A formación de demanda en Galicia amosa un maior número de participantes (25.230). Segundo o tamaño da empresa danse as maiores porcentaxes (68,3%) en catro grupos de empresas, no seguinte orden: nas empresas de máis de 4.999 persoas traballadoras; nas de 10 a 49; nas empresas de 1 a 5 persoas traballadoras; e aquelas con intervalos de entre 1.000 a 4.999 persoas traballadoras.

Por modalidades de impartición da formación, o 45% dos participantes completan a súa formación de xeito presencial, mentres que un 26,3% faíno a distancia, e optando os restantes por unha combinación mixta de ambos modelos.

Por contidos formativos, "Prevención de riscos laborais en xeral" concentra o maior número de participantes, con 33.057 (21,6%), mentres que as dúas seguintes accións de maior número de formados son a Xestión de Recursos Humanos (6,3%) e Informática de usuario - Ofimática (5,6%).

Décimo novena. Na formación de oferta a convocatoria pública para a programación de accións formativas dirixidas prioritariamente ás persoas desempregadas na Comunidade Autónoma de Galicia supuxo no ano 2010 a programación de 1.388 cursos cun orzamento total de 77.982.528 euros. Estas accións regúlanse na Orde do 28 de decembro de 2009, pola que se establecía a convocatoria pública para a programación de accións formativas dirixidas a persoas desempregadas na Comunidade Autónoma de Galicia, correspondente o exercicio do 2010.

Vixésima. O total de accidentes en xornada de traballo experimentou, en 2010, un descenso do 7,05%, sendo máis significativa a diminución nos accidentes mortais cun 12,16%. Mantense polo tanto a tendencia decrecente que se iniciou no ano 2008. Na clasificación por actividades económicas dos accidentes, a construción segue a ser a actividade que máis sinistralidade rexistra.

Vixésimo primeira. Galicia, no total de accidentes, está por riba do índice de incidencia estatal pese a observarse unha diminución respecto de anos anteriores, tendo catro comunidades maior índice de incidencia. Referido a accidentes mortais, Galicia ocupa o primeiro lugar de las Comunidades Autónomas cun índice que está máis de 4 puntos por riba da media estatal.

Vixésimo segunda. O número de convenios colectivos que existen en Galicia a 31 de decembro de 2010, xa sexan vixentes ou prorrogados tacitamente, é de 816, dos cales 131 son de sector e 685 de empresa.

Asináronse por primeira vez este ano 20 novos convenios (2 de sector e 18 de empresa), continuando deste xeito a tendencia ao incremento do número dos mesmos.

Vixésimo terceira. O incremento salarial pactado nos convenios colectivos asinados e revisados en 2010 foi do 2,69%. Esta media é inferior ao IPC galego deste ano, que foi do 3,1% e ao estatal que foi do 3%.

O 45,6% dos convenios asinados e o 57,7% dos revisados recollen cláusulas de revisión salarial, mentres que o 30% dos convenios colectivos de sector asinados en 2010 recollen cláusulas de desvinculación salarial.

O 98,6% dos convenios asinados recollen cláusulas sobre saúde laboral.

O 70,1% dos convenios asinados recollen cláusulas sobre discriminación e/ou acoso.

O 22,5% dos convenios asinados recollen cláusulas sobre o idioma.

En 19 convenios (5 de sector e 14 de empresa) indican a distribución irregular da xornada e noutros 18 (8 de sector e 10 de empresa) indícase a posibilidade de establecela.

O número de convenios colectivos que recollen cláusulas de sometemento ao AGA foi de 48 convenios, o 32,7% do total dos asinados.

Existen cláusulas sobre fomento da contratación indefinida en 70 convenios (47,6% dos asinados) que afectan a 56.933 traballadores/as (76,1%), sendo 15 deles de sector e 55 de empresa.

Vixésimo cuarta. O número de folgas realizadas neste ano experimentou un claro descenso en relación cos anos anteriores, diminución que se aprecia no número de persoas traballadoras participantes e nas xornadas non traballadas. É significativo que o motivo máis frecuente da conflitividade, no que a folgas provinciais se refire, estea constituído pola falta de pagamento de salarios, seguido das regulacións de emprego.

Vixésimo quinta. En expedientes de regulación de emprego, aínda que se aprecia un lixeiro descenso en relación coa cantidade experimentada no ano 2009, mantense, tanto en número de expedientes (1.014) como en persoas traballadoras afectadas (14.036), en cifras moi superiores ás de anos anteriores.

Vixésimo sexta. O número de persoas perceptoras da prestación económica de desemprego continúa incrementándose tanto en Galicia como no estado en 2010 (un 14,88% en Galicia), situándose en 149.700 persoas perceptoras en media anual.

Vixésimo sétima.- A relación activos/pasivos no sistema da Seguridade Social ven a afondar en 2010 o signo negativo: maior incremento dos perceptores de prestacións en relación cos afiliados, pasando a representar 1,40 cotizantes por pensionista, fronte ó 2,03 do conxunto do Estado.

Vixésimo oitava. Analizando os resultados dos procesos electorais en Galicia durante o período de catro anos, e tendo en conta os representantes con mandato en vigor a 31 de decembro de 2010, a central sindical UGT-Galicia, cun 31,55% do total, é a que obtivo maior número de representantes (6.358), seguida do SN de CC.OO. de Galicia e CIG, cun 29,51% e 27,52%, respectivamente (5.948 e 5.5547 representantes), acadando un total de 2.301 o resto de centrais sindicais e grupos de traballadores cun 11,42%.